

Heilbrigðisráðuneytið  
Skógarhlíð 6  
105 Reykjavík

**Sent á samráðsgátt**

Reykjavík, 13. febrúar 2019

**Efni: Umsögn um reglugerð um merkingar á umbúðum rafrettna og áfyllinga og efni upplýsingabæklings sem fylgja skal rafrettnum og áfyllingum.**

Félag atvinnurekenda (hér eftir „FA“) hefur haft til umsagnar reglugerð um merkingar á umbúðum rafrettna og áfyllinga og efni upplýsingabæklings sem fylgja skal rafrettnum og áfyllingum sem birtist til samráðs á samráðsgátt stjórnvalda 30. janúar sl. Umsagnarfrestur er til 13. febrúar 2018.

Reglugerðardrögin voru uppfærð 11. febrúar sl. en á samráðsgátt kemur fram að í upphaflegum reglugerðardrögum sem birt voru til samráðs hafi verið gert ráð fyrir að á umbúðum áfyllinga fyrir rafrettur skyldi birta staðlaðan texta þar sem segði að varan innihéldi níkótín. Fyrir mistök hafi gleymst að gera ráð fyrir áfyllingum sem eru án níkótíns og eiga eðli málsins samkvæmt ekki að vera merktar með slíkum stöðluðum texta. Hefur þetta verið leiðrétt í nýjum reglugerðardrögum.


FA fagnar því að ráðuneytið skuli hafa gert framangreindar breytingar á reglugerðardrögunum en félagið vakti m.a. athygli á þýðingu upphaflegu reglugerðardraganna í sjónvarpsviðtali 31. janúar sl.

Aðrar athugasemdir eru eftirfarandi:

Samkvæmt 6. gr. reglugerðarinnar skal með pakkingum rafrettna og umbúðum áfyllinga fylgja bæklingur með upplýsingum á íslensku um atriði sem eru tilgreind í liðum 1 – 6 í ákvæðinu. Ákvæðið felur í sér innleiðingu á a-lið 4. mgr. 20. gr. tilskipunar Evrópuþingsins og ráðsins 2014/40/ESB frá 3. apríl 2014 um samræmingu ákvæða í lögum og stjórnvaldsfyrirmælum aðildarríkjanna varðandi framleiðslu, kynningu og sölu á tóbaki og tengdum vörum og um niðurfellingu á tilskipun 2001/37/EB. Í 1. mgr. 8. gr. tilskipunarinnar kemur fram að aðvörunarmerkingar í skilningi tilskipunarinnar skuli vera á tungumáli aðildarríkis. Ekki eru gerðar kröfur um að aðrar merkingar eða leiðbeiningar skuli vera á tungumáli aðildarríkis. Er þess óskað að reglugerðinni verði breytt til samræmis við framangreint enda gengur reglugerðin lengra en tilskipunin að þessu leytnu til. Þá gerir félagið athugasemd við hve seint reglugerðardrögin liggja fyrir.

Félagið hefur ekki frekari athugasemdir við reglugerðina á þessu stigi en áskilur sér rétt til að koma frekari athugasemdum á framfæri eftir því sem tilefni gefst til.

Virðingarfyllst,

  
Guðný Hjaltadóttir, lögfr. FA